

四庫全書

史部

欽定四庫全書

史部

平定兩金川方略卷一百二十七

給事中_臣查善長覆勘

總校官原任侍講_臣王燕緒

欽定四庫全書

平定兩金川方略卷一百二十六

十月庚辰阿桂豐昇額海蘭察額森特奏言查達
思里山腿迤下將至溝邊有碉寨數處在雅瑪朋
寨落之西科思果木官寨之東均在卡布角所屬
各寨之內攻得此處則科思果木已攔截在內雖
與科布曲賊衆尚可相通而既有一水之隔援應
已多不便自不難于攻取且賊必疑我又將從此

踰溝斜上為搶佔科布曲之計亦必撤其力量於此嚴防其西里等處既可相機搶佔而從此可以籌辦之處亦多臣等察看山腿迤下之處有路三條當於二十三日派烏什哈達官達色福康安等各帶兵一隊循山腿而下分路進攻臣海蘭察率同格勒爾德泰斐英阿等帶兵援應查此處山腿其上本有三碕以次相接前攻克達思里寨時業經攻得一碕特因是時欲為繞進橫截之計是以

未將第二三碉掃盡是日黎明臣豐昇額督率官兵前進先將第二碉攻獲其第三碉之賊已覺勢孤無助官兵直衝碉下攀附以登又將第三碉攻破碉內賊人殲斃甚多並攻破碉下寨落五處所克碉寨悉行焚燬查此時達思里山腿上下之碉寨已清若下至溝邊將雅瑪朋寨落及科思果木往來路徑竟行佔住又可添一進取之路仍於達思里一帶察看西里及安布魯木賊人如稍有抽

撤疎懈之處轉可出其不意突然繞攻臣等現在
督兵即於所燒各寨落處掣柵而下相機攻搶奏

入

上諭軍機大臣曰阿桂等此次進攻雖未能得賊人要
隘然已將達思里二三碉攻克焚燬且擬於所燒寨
落處掣柵而下相機攻搶阿桂隨地偵探部署無一
刻不切實用心又且長於籌畫近亦思迅速歲功遇
有應進之處自能經理得宜此時自應及早得手

甲申明亮奏言斯底葉安為納木迪藩蔽賊人聚
衆死拒難以力取查賊人守柵俱於濠內潛伏以
避迎面大砲現在相度形勢於額爾替之西基木
斯丹當噶之下連日趕掣木城石卡七處直接克
爾瑪山嘴築起砲臺緊與賊人所挖濠口相對於
此多設砲位隔溝轟摧則濠內之賊不能藏匿仍
於迎面用砲擊打木柵一俟賊人稍露慌亂情狀
即派兵努力進攻奏入

上諭軍機大臣曰明亮奏進攻斯底葉安未得擬於克爾瑪從旁用砲轟擊所辦尚好其法於進攻甚便朕曾屢降諭旨令將軍等妥辦今明亮所籌與朕前旨相合自能直擊壕中之賊使其無從匿伏我兵越壕而過便可無虞阻遏但順壕放砲以賊人逃竄出壕為度若我兵過壕時鎗砲即宜停止不可悞放凡有賊人挖壕守拒之處果然相度形勢妥協為之自屬事半功倍即阿桂等亦當照此籌辦

丙戌阿桂豐昇額海蘭察額森特奏言查達思里
直下一支為正山腿其餘尚有三條臣等於二十
三日攻克焚燒各碉寨之後即掣柵十五座已距
雅瑪朋碉寨不過一箭之地因達思里山腿正支
之下又有山包一處其上設有雙碉均屬完固未
免稍費兵力隨於二十七日折向西面山腿掣柵
前進又經掣起五座二十八日黎明復分派官兵
循梁接掣賊從林箐中間繞過掣柵之處上前衝

突福康安普爾普等督率官兵奮力衝殺賊人傷
死甚多始行敗退官兵又接拏木柵二十一座直
至河沿其科思果木與雅瑪朋寨落往來之路已
被中間截斷臣等逆料此夜賊人勢必乘木柵外
壕溝攔木尚未十分堅固復來侵擾遂令侍衛楚
巴什等帶兵分為三處於新拏木柵之前潛行設
伏及至三更果有賊二百餘人由林箐中潛出直
撲最前新拏木柵四座我埋伏官兵先經望見一

俟賊至柵邊內外擊打賊人驚惶奔竄官兵趁勢
下追直至密箐之內賊人被殲及負創逃者甚衆
查官兵直至河沿則科思果木官寨已攔截在內
雖尚可踰水過溝與科布曲山腿之賊稍通聲息
然勢孤援遠自不能久於拒守臣現擬於達思里
山腿下所架柵內築起砲臺用砲先摧山包上雙
碉即搶佔雅瑪朋寨落諒不至費手並察看西里
一帶賊人若見此處攻打緊急稍有移動並即分

兵攻搶務期即克奏入

上諭軍機大臣曰阿桂等奏官兵由達思里山腿挈柵業已下至河沿將科思果木與雅瑪朋寨落截斷賊人不能往來應接自可立時攻克至賊人當此窘迫之際尚敢潛出侵擾實為可恨幸官兵防守甚嚴殲賊甚多稍足使蟻衆知警但侵劫營卡乃逆賊鬼蜮長技各路軍營皆不可不實力防守並須隨時偵察勿稍疎懈

壬辰阿桂豐昇額海蘭察額森特奏言官兵連日以來於達思里迤下各條山腿極力攻搶下至河沿已將科思果木攔截在內又挈柵鑄砲賊料官兵即於此處為攻取卡布角搶上科布曲之計又於此悉力抵禦其與勒烏圍前相對之科布曲山腿中隔大溝崖礪陡峻賊人恃其險阻守禦不無稍懈轉可乘此進攻臣額森特率同富興書麟保寧特成額分兵兩隊從正面攻搶並於山坳設伏

以截來援初五日丑刻各隊跣水而過潛密無聲
搶上山梁先得碉前大卡一座殺賊數名乘勢直
抵大卡之下賊人羣起放鎗因是碉共有三層賊
番等平日用梯上下並無門戶官兵一面拋入火
彈一面挖掘碉根賊已陸續來援經官兵分頭迎
擊及埋伏之兵突出截殺所斃甚多攻至辰刻碉
內賊人抵拒益密相度所得之卡佔據亦為無益
因令官兵撤毀而回查雅瑪朋寨上山包所有雙

礮係一新二舊新礮易于轟毀舊礮頗為堅固當
將礮先擊舊礮已有坍塌毀現并轟擊新礮擬於一
二日內發兵攻搶一得雙礮既可搶佔雅瑪朋寨
落即科思果木官寨亦歸掌握從此相機攻取科
布曲其道路又寬總之此時進搗噶拉依賊巢止
隔此科布曲山梁一經搶據即已事半功倍

同日阿桂豐昇額又奏言查扎烏古山梁本在勒
烏圍西北隅今既尚未攻克則勒烏圍近在沿河

防守自不宜疎是以臣等于攻克勒烏圍後令額森特帶兵於轉經樓甲爾日磧橋一帶駐扎以便相機攻搶科布曲山腿并防範河西其自梭洛柏古至達爾扎克又至密拉噶拉木巴占榮噶爾博勒烏圍一帶山梁為軍糧軍火臺站所經臣等均已相度緊要處所順梁分設營卡萬無一失至勒烏圍以北冷角寺赤布占等處沿河地方原無須兵駐守今臣等皆設有營卡直過對岸營卡之北

以此處與沙爾尼兩岸相對使賊人不能從北繞
過臣等前令額森特在噶拉宇一帶統領攻打彼
時甲爾日礮橋轉經樓勒烏圍仍留五岱富興烏
爾納等在彼防守及至莫魯古等處攻克接通之
後額森特即已仍回勒烏圍駐劄今復傳諭額森
特加意嚴防斷不致稍有疎懈奏入

上諭軍機大臣曰阿桂等奏攻打科布曲山腿礮卡並
砲轟雅瑪朋寨上山包雙礮實為用心周到前此惟

恐勒烏圍後路或有賊人潛來滋擾是以屢次傳旨詢問今據阿桂覆奏措置尤屬周密阿桂凡遇攻佔賊碉多係繞道分兵而得所有節次調度明亮豈不聞知何以屢次進攻輒為賊衆阻遏就圖中形勢而論若從教成所守之甲索山梁下攻斯底葉安一路則自上下壓較為利便或可有得但不宜輕率移兵致賊人窺見預防徒勞無益

丁酉明亮舒常奏言河西進兵道路止有碾占巴

扎木扎烏古三處屢經竭力進取皆以賊人守禦甚密尚遲進步即斯底葉安一帶地方亦無隙可乘臣等商議斯底葉安為納木迪屏蔽賊所必爭之地現因連次攻打以為官兵所重在此聚其力量立柵固守臣等現將全營滿漢屯土兵丁均勻配搭分為六隊每夜輪派一隊於琅谷什扎古等處往攻斯底葉安如有可乘之機即行佔據否則亦可使賊人於夜霧迷漫之際莫測多少勢必盡

來接應如此更番迭進數日之後賊必疲于奔命而我兵得以逸待勞攻其無備但將扎烏古山梁一經搶據則不惟斯底葉安納木迪可以不攻自潰而後路自達爾圖至基木斯丹當噶所設防兵皆可抽赴前敵應用於進剿尤為迅速奏入

上諭軍機大臣曰明亮等籌辦進剿情形一摺此事朕曾計及正欲傳諭明亮等今所奏適與朕意相合自應如此辦理明亮等當努力妥為之閱所奏降番木

爾甲供詞稱幾日前頭人還囑付說你們好好堵擋
不過一兩月天朝就准我們投降等語賊首等當此
窮蹙之時尚敢造為誑語籠絡羣賊此皆從前准令
投降故得藉以誑惑番衆今官軍分路進勦阿桂現
在乘勝深入指日掃穴擒渠想各土司等自無不共
知此意惟助惡黨逆之衆尚為逆酋所愚護死力拒
自應令屯土兵丁等隨時宣布使衆番知逆酋賊目
罪在不赦斷不能復為姑寬若番人此時及早投出

尚可貸其一死如執迷不悟一經攻克礪寨凡拒守之賊盡誅無赦如此亦足以破逆酋之計而散衆人之心至官軍進勦則愈當加緊庶賊益知畏懼成功更易

戊戌阿桂豐昇額海蘭察額森特奏言查雅瑪朋寨上山包名達噶木山腿至此復派官兵進往攻奪仍須自下搶上前訊之投番稱賊人已於山包兩旁山溝林箐之內設伏預備以撓我進取之兵

自宜再接木城前逼始可奮勇力攻當於初八日
令官兵架柵五座又於初十日架柵七座已無慮
賊人從旁衝突但賊人狡獪異常以雙礮被礮轟
摧日就頽塌已無可恃因在兩礮中間橫挖溝濠
一道順溝聯排石卡五座其內均有賊人以拒官
兵直上衝撲之勢且此雙礮後賊人尚有兩礮互
為援應現在所轟之雙礮內新礮雖毀其舊礮尚
未大塌當派福康安普爾普等帶兵在左翼烏什

哈達瑚尼爾圖等帶兵在右翼臣海蘭察等從中路進攻豐昇額隨後接應於十一日丑刻進發此處賊人聚集甚多一俟官兵將上山包其壕中卡內以及各碉之賊合力放鎗並將大石推轉而下勢甚緊密其將抵碉卡之處坡礪倍為陡削臣海蘭察一面催督中路官兵竭力迎擊一面令兩翼官兵從左右抄越施放連環鳥鎗直壓山包兩旁及南面抵敵之賊中路官兵將各卡悉行奪取其

溝濠之賊奔竄無路大半殲斃壕中乘勢進撲各
礮飛騰直上新舊兩礮立時攻克並將後二礮一
併克取所有礮卡內賊人除被殲之外其逃出者
又被官兵往下窮追鎗箭所殪更為不少查達噶
木一處實為賊境緊要咽喉今被官兵力攻而得
非惟下壓雅瑪朋礮寨較易為力而西里下截山
腿雖本有礮卡賊又新架起木城而地勢尚非甚
險從此攻搶尚不至於棘手臣等現復煇柵下逼

并移砲往轟一面攻打雅瑪朋碉寨以亂賊人耳目即一面直搶西里下截山腿如將此處佔據則進攻科布曲山梁道路已寬自可即望克捷

同日阿桂豐昇額又奏言本月初七日小金川頭人末利阿什咱同其妻舅阿噶爾甲各帶家口投至軍營查該二番於小金川頭人中頗為著名若非實有見於金川滅亡在即斷不肯冒死投出今末利阿什咱并將伊母置而不顧其為情急來投

更屬顯然且即其所稱索諾木已將異母之莎羅
奔等誑至噶拉依不令復出而賊目等又皆彼此
猜疑其勢已成瓦解臣等現在竭力奮攻自不難
迅為犁掃惟末利阿什咱係帶兵抗拒之人而阿
噶爾甲則於三十七年投誠三十八年在木果木
出兵帶傷回至本寨即與金川勾結滋事情罪本
無可宥但此時若遽行嚴辦或解送京師則金川
頭人及在金川之小金川頭人心生畏懼轉不能

多行生致臣等現將其家口發往附近內地土司
地方安置其末利阿什咱阿噶爾甲應請暫緩辦
理以供軍營體訪賊情之用並誘賊目等投順可
以多得生致數人明正典刑以快人心仍飭幹員
留心防範亦斷不至稍有疎失均奏入

上諭軍機大臣曰阿桂等奏攻克達噶木山包賊碉現
在設法分攻雅瑪朋碉寨以便進攻科布曲所辦甚
好達噶木為賊緊要咽喉今官兵既已佔據從此進

攻自更得力又奏小金川頭人末利阿什咱同其妻
舅阿噶爾甲投至軍營請暫緩辦理以供軍營體訪
之用所見亦是末利阿什咱係小金川頭人黨助逆
酋帶兵抗拒與既降復叛之阿噶爾甲情罪均無可
逭今阿桂既欲暫留在營供用或可稍資其力亦未
可定設其人果欲立功自贖實有可藉以誘惑賊衆
之機即酌量賞給頂帶使衆番艷羨亦無不可統俟
大功告成之後將該賊目解京另行辦理再西路之

兵因阿桂屢戰克捷遇敵皆踴躍直前而北路之兵
因明亮經久未能寸進衆心不免稍阻自當設法鼓
舞使人知勵勇効用方為有益明亮舒常各宜努力
自奮

甲辰阿桂豐昇額海蘭察額森特奏言官兵既克
達噶木下距雅瑪朋碉寨已為至近臣等一面挈
柵下逼一面移砲轟摧已多坍毀但卡布角一帶
寨落尚多官兵從此前進必穿寨落中間而過兩

邊均係賊番屯聚若稍有不甚應手之處則酌撤
既難而接續亦為不易必須直搶西里下截山腿
則雅瑪朋寨落及科思果木悉已攔截在內而由
們都斯進搶科布面山梁上之索隆古地方始可
進退自如雖該處在西里賊碉迤下但審山巒形
勢只須掣住卡柵則雖賊人自上下壓亦可無虞
此時既不可稍露我兵有攻取西里山腿之意而
一得西里山腿亦必迅掣木柵佔據為即進搶們

都斯索隆古之計庶可出賊不意深入其阻此時西里山腿卡柵賊雖已有備禦但我兵現在力摧雅瑪朋碉寨以混其耳目使賊人揣我必將卡布角山溝各碉寨速行掃盡始搶西里山腿防備不無稍疎臣等即於一二日內發兵攻取

同日明亮舒常奏言查納木迪官寨屢次進攻總以官兵下至溝底即三面受敵而近西一帶碉寨賊鎗尤難躲避必須於烏岳之前接弩木柵數座

臣等先已砍伐木植齊全並預備裝土口袋為臨時立柵將口袋外圍以防賊人前來滋擾即可藉為抵禦隨于十七日亥刻正當霧氣四塞仍照常督兵由斯底葉安牽綴一面即派珠爾格德等帶兵由烏岳直下方將口袋圍起趕立木柵移時霧散月明旋為賊人望見即有一百餘人從西蜂擁而至我兵俟其臨近箭如雨發賊人應弦倒斃甚多即踉蹌四遁少頃賊自左手南下捨死向前進

撲抵鬪逾時復又敗去其時已趕立柵二座相距
納木迪不過一箭可及現將近西礮寨從中截斷
若再接掣木柵二座愈逼愈近則賊人斷不能仍
前拒守臣等查納木迪一路賊人悉力以拒其扎
烏古山梁必防禦稍疎今綽斯甲布土司土舍情
願搜集各寨土兵添同進勦約在此數日內即可
到齊乘此人心思奮自卜所向克捷臣等擬將全
營滿漢屯土官兵儘數抽調即於扎烏古伺隙以

進務在算出萬全以期必克均奏入

上諭軍機大臣曰阿桂奏籌辦搶佔西里下截山腿並預備攻奪科布曲山梁情形阿桂實心調度設法進攻實為可嘉而各路之兵亦惟阿桂最為可恃是以盼望尤切但自攻得勒烏圍以來距今已七十餘日雖所至已屢有克捷而於西里及科布曲兩要隘尚未攻克朕因此晝夜焦思阿桂自必深體朕心力圖迅速集事又據明亮等奏於納木迪趕掣木柵圖搶

扎烏古所籌尚好賊人屢遇官兵進攻皆預為窺伺暗中抽調賊衆密施鎗石堵拒今既接弩木柵逼攻賊人自不能復如前拒守況於納木迪進攻可進則進否亦可以牽綴賊勢一面令滿漢官兵率同綽斯甲布土兵等搶佔扎烏古山梁出其不意自可望得手明亮等各當努力

閏十月丙午富勒渾鄂寶劉秉恬奏言現在大兵攻過勒烏圍所有糧運事宜自應隨時酌辦將前

此卓克采一路臺站全行裁撤以歸省便除原派北路商米先經臣等飭令軍需局改運西路現據報出之米俱係運赴西路各站交收其北路滾運之米業已飭令停止並將達思滿至孟拜拉各站存米速行趕運前進運完一站即撤去一站次第捲裁不過十餘日即可完竣奏入報

聞

辛亥明亮舒常奏言現於納木迪趕立木柵二座

更擬於扎烏古添湊土兵伺隙以進隨於二十五日丑刻派令副都統噶塔布等帶兵又起木柵一座將及黎明賊已蜂擁而至扳柵搶奪我兵鎗箭並發其近前者紛紛倒斃賊人於一日之內又經三次衝突皆被我兵盡力追殺臣等恐其夜間復來滋擾於柵外預為埋伏至亥刻果有賊衆分股前來我兵猝然並起攪殺逾時始行潰散臣等現擬於扎烏古進勦一面飭令霍爾甲阿咱拉帶同

投番八名黑夜由沿河深入跣探道路仍令索倫
吉林及屯土兵丁一路尾隨於逐節險要之處設
伏以待其時賊人旋已知覺俟霍爾甲等已過賊
境即行截住要口霍爾甲等即回身并力突圍正
在彼此相持而策應之索倫吉林屯土各兵復自
賊後掩擊霍爾甲等即乘勢衝出並無一人損傷
大約此時賊中光景雖沿山卡隘糾聚多人嚴為
守禦而其腹中如乃當阿爾古等處均見空虛臣

等現飭土司雍中旺爾結催調各寨土兵趕緊前來務將扎烏古剋期搶佔奏入

上諭軍機大臣曰明亮等奏逼近納木迪接拏木柵並密跣道路尅日進攻所辦尚好看來明亮等軍營近日大有起色益當勉力為之今阿桂等現擬攻勦西里科布曲要隘自可即期得手明亮復乘機而進兩路並攻賊勢必更窘迫官軍成功尤速其霍爾甲阿咱拉及投番八人俱甚出力明亮當量為賞賚以示

鼓勵至索諾木兄弟不和節次降番供詞如一並有
稱其將異母兄弟留於噶拉依用以備事急獻出求
饒者尤為可惡索諾木罪大惡極雖寸磔不足以蔽
辜乃圖於勢窮力竭之時將其異母不和之兄弟縛
獻了事以為倖免之計其居心狡惡如此更屬覆載
所不容索諾木負恩反噬實此事罪魁莎羅奔雖黨
惡當誅然不能僅戮此數人轉貸索諾木之死設或
索諾木竟將莎羅奔兄弟縛獻將軍等惟當留心防

備不使藉詞施計仍一面將莎羅奔兄弟拘留一面設法掩擒索諾木並益加奮勉攻勦務期掃蕩巢穴搜捕兇渠勿使免脫漏網

丙辰阿桂豐昇額海蘭察額森特奏言現又跣探西里賊寨之上有黃草坪一處雖其上下俱有賊礮搶佔亦屬不易但突然搶上一面多備勁兵勦殺各處來援之賊一面佔據其地只須盡一日之力將木柵架定數處則已將西里山梁各礮寨聯

絡之處從中隔斷下壓自易為力

同日阿桂豐昇額又奏言前奉

上諭以臣等處尚需兵力或於後路調兵三千名亦無
不可而體察後路情形底木達可抽七百餘名美
諾可抽四百餘名業經行知常青等抽撥今復奉
諭旨令將抽後路之兵調赴明亮軍營查此項兵丁一

千一百六十餘名已於十月二十九日到齊臣等
當即札致明亮並令此項官兵即於初一日渡河

前赴沙爾尼聽用均奏入

上諭軍機大臣曰阿桂奏探得西里賊寨之上有黃草坪一處若突然搶佔下壓自易所籌甚好邇日想已得手看來賊衆勢已慌亂官兵若能即將西里攻得不但科布曲之賊可不攻自潰其餘則朗噶克了口等處自皆可乘勝席卷番地冬令天氣多晴阿桂務須趁此時努力為之又另摺奏底木達抽兵七百餘名美諾抽兵四百餘名俱令其赴明亮軍營聽用前

據明亮等奏現在設法進攻納木迪一帶正需兵力
若新調之兵到彼明亮等即能統率前進攻克賊碉
固屬甚善設或攻勦未能即克仍如前坐守則是將
有用之兵置之無用之地又不如令此一千一百餘
兵仍赴阿桂軍營添助聲勢於事更為有益倘明亮
一路實需此項兵丁應用不能再赴西路阿桂或酌
於美諾一帶後路除防守要隘外尚可抽兵千餘令
赴西里一帶備用自屬更捷若難以再調亦不必勉

強從事轉致留防之員得以藉口此事著交阿桂熟籌妥辦

同日劉秉恬奏言查本年八月間攻克勒烏圍後軍營舊存之鐵及揀獲砲子甚多已屬充裕是以九月內運出桃關生鐵僅有三萬餘觔今軍營存鐵既屬有限自當即時上緊趲運以資接濟因思軍營等處雖前經派人揀獲砲子鎔鑄使用然勒烏圍遜克爾宗得式梯格魯克古康薩爾勒吉爾

博榮噶爾博噶爾丹喇嘛寺等處從前打出砲子
均皆不少臣隨就近馳赴密拉噶拉木派員多撥
人夫再行揀尋復又揀得砲子數千顆計重七萬
餘觔除局內舊存生鐵五萬觔外加以此次揀得
砲子七萬餘觔即每日用砲轟擊已數二十餘日
之用臣回至揪砥經過沿途各站又復親加督查
現由揪砥運出西路生鐵六萬餘觔均已絡繹在
途是此項鐵觔一經到營更足以資接濟奏入報

聞

戊午明亮舒常奏言前月二十四日逼近納木迪
復立木柵一座查此柵既立之後即趕運砲位連
日轟摧其寨內左右牆垣漸見坍塌并旁近寨落
亦間有塌損之處賊人藏伏地窖惟屢於夜間捨
死前來搶奪均經守寨官兵鎗箭並發而遁現在
賊勢窘迫殊甚納木迪一處攻之自屬非難第念
由此進攻斯底葉安為上通扎烏古之計層層攀

越未免仰攻費力查綽斯甲布派添土兵業經陸續到來茲復准將軍阿桂札知將抽調底木達美諾等處官兵一千一百餘名前赴沙爾尼聽用是此項官兵合之新到土兵皆屬格外增添再加以本營滿漢兵丁儘數抽調尚可得三千數百人臣等公同籌議兵力既見加增則攻取尤期扼要今官兵所佔扎烏古第一條山腿之上賊雖卡隘重重然近日屢由納木迪進攻賊人既注意於此諒不

能周密於彼現擬將新舊官兵部署已定務期一舉得手若將扎烏古佔據則斯底葉安納木迪等處更可不煩兵力奏入

上諭軍機大臣曰明亮等現在攻打納木迪連日用礮轟摧賊寨看來明亮軍營近日漸有起色自可即望克捷阿桂現攻西里等處可期即克若明亮復能將扎烏古一帶攻得乘勝深入賊勢必更窘蹙自可迅速歲事各路將軍參贊等層層攻勦籌畫宣勞將士

等亦俱奮勇出力深為厘念適盛京進到野雞鹿肉
皆將軍等在外所不能得者今寄賞阿桂明亮富德
三路將軍各一分以示優眷

平定兩金川方畧卷一百二十六

欽定四庫全書

平定兩金川方畧卷一百二十七

閏十月壬戌明亮舒常奏言查扎烏古第一條山腿雖經官兵佔據而其上第二山腿則在隔河勒烏圍之北第三山腿與勒烏圍相對下與阿爾古相接非惟碉卡層密且沿河一帶俱係懸崖別無路徑即迎面上攻亦甚陡險賊人俱於高處據險以待惟查兩山腿中間夾有深溝有一線可通之

路必須手足並用攀崖附葛而行雖極為冒險諒
向來賊人力量不過能守一面或轉可以出奇制
勝隨再四商酌令奎林和隆武阿爾薩朗等挑選
滿漢屯土兵丁分為三路加派可信投蕃在前引
路密從溝內進發仍於迎面陰坡派令都爾嘉等
攻取扎烏古上截山梁珠爾格德等攻取扎烏古
下截山梁尚有山半四處碉卡派參領額爾伯克
侍衛進財保分為兩路攻取定於初七日子刻臣

等督率前進未及黎明德赫布及噶塔布等先於
什扎古琅谷兩處統衆努力攻撲遙見克爾瑪巴
扎木俱已鎗砲並起官兵奮勇齊上賊人方當放
鎗滾石而奎林和隆武等已由溝內直上山頂我
兵立脚已穩勇氣百倍而賊人於設想不到之地
忽見此一路官兵先已慌亂所有第三條山腿之
上共有三碉九卡隨到隨克而都爾嘉珠爾格德
即乘勢分搶四碉八卡額爾伯克進財保亦於山

半共攻得三碉四卡各路合兵一處復分為兩路
一由扎烏古上攻直至相近日斯滿而止一由扎
烏古下壓直至相近阿爾古而止總計此一道所
克山梁自日斯滿起至臨河共綿長二十餘里是
日賊人為鎗箭所斃滾崖落箐甚多共割獻首級
耳記三十餘件生擒賊番男婦大小二十二名槍
獲銅鐵砲五位鉛丸火藥十五篋臣等思扎烏古
山梁為賊人緊要咽喉既已全行攻克則納木迪

官寨斯底葉安等處已攔截在內自山梁向北下
望賊人動靜纖微畢見因趕立木城九座石城十
二座官兵分頭駐扎其日斯滿以上木甲索以下賊
人雖負其一隅已無碍我兵前進之路現擬將斯
底葉安納木迪趕緊肅清則後路皆歸嚴密更可
將達爾圖基木斯丹當噶各處防兵抽赴前敵應
用奏入

上諭軍機大臣曰據明亮等奏官兵將扎烏古山梁全

行政克明亮舒常如此奮勉庶覺畧增顏面現在即可乘勝深入而納木迪斯底葉安等處攔截在內並可不攻自潰此一路官兵聲勢日盛大有起色至逆酋索諾木常在甲禰賊寨居住其地在河之西與明亮軍營相近明亮等將河西一帶碉卡勦蕩肅清之後若能統兵徑赴甲禰攻圍賊寨將索諾木及其得力頭人槩得擒縛其功亦不為小庶可與阿桂等同膺渥眷明亮等宜努力為之

甲子阿桂豐昇額海蘭察額森特奏言西里山腿
迤上有黃草坪一處其上下雖皆有賊人碉卡守
禦若能突然搶佔已將賊碉從中截斷自上下壓
攻搶自易臣海蘭察率同侍衛章京帶領勁兵在
前攻佔令烏什哈達等帶兵在黃草坪趕擊木柵
又派侍衛額爾特等於黃草坪以下接擊木柵而
令福康安瑚尼爾圖秦斐英阿等防護以備勦殺
來援之賊又派普爾普五福等在額爾特之下溝

底拏柵海祿官達色在溝北對面拏柵復派成德等
由色木里前進攻打黃草坪以上賊人碉卡並截
堵安布魯木等處賊援初七日丑刻各隊官兵前
進將至黃草坪賊人向下衝突官兵分為數隊施
放鎗箭奮迅攀援而登直上黃草坪地方合力剿
殺賊人踉蹌奔潰官兵遂佔據其地并乘勢攻克
寨落三處一面令烏什哈達等督兵趕拏木柵至
午刻賊人均攢集於烏什哈達所拏木柵山包之

後而各處之賊又已陸續前來約共有三百餘人于山包之後突然吶喊下壓拏柵之兵該處屯土各兵故為少却引至明敞地方臣海蘭察帶兵從拏柵之地直前迎擊而誘賊之屯土各兵復回身奮擊殲斃甚多餘賊始行逸去至日落時趕拏木柵二十餘座而賊乘官兵撤回之際又從箐林中突出經我兵回身衝殺各柵官兵亦內外合擊始行鼠竄及至亥刻又攢集二百餘人潛來臣海察

察等飭令官兵凝然不動俟賊至柵邊一齊放鎗
射箭賊人倒斃紛紛旋即敗遁計此數次殺賊共
二百餘人日間並見有紅衣賊屍三具為賊拖曳
而去至科布曲山腿臣額森特於初八日丑刻派
兵分隊進攻保寧特成額烏爾納一路官兵先行
蹠水過河並無聲息一抵山根迅速搶上將大碉
一座石卡一座克取殺賊二十餘名乘勢進攻東
西山巒突起處大碉維時後隊接應官兵正在陸

續上登賊亦分路迎拒官兵向上仰攻極力鏖戰
直至辰刻因山脊逼窄不能一擁而上而所得碉
卡正在峯巒上大碉之下賊人鎗砲一一可及難
以久站擊柵因將所得碉卡折毀暫行酌撤此次
科布曲打仗二等侍衛寧珠布陣亡西里打仗總
兵曹順二等侍衛薩爾吉岱因勇往太過騎在木
柵之上下射賊人並指揮官兵賊知為領兵官員
致被暗箭所傷陣亡其餘陣亡受傷官兵統俟查

明另行咨部查西里一帶實係賊人緊要門戶今官兵佔據之黃草坪地方所有木柵俱已收拾堅固再拏數柵直可直上山梁之頂橫截於賊人碉寨中間則在上之賊不能援應在下之賊官兵不難衝壓一得是處則迤下皆可迎刃而解上搶索隆古則朗噶克了口道路更寬賊人即聚集拒守亦必不能遍為堵禦奏入

上諭軍機大臣曰阿桂等奏官兵攻搶西里山梁黃草

坪拏柵佔據並攻打科布曲山腿在事之將領弁兵
實屬奮勉據阿桂現在擬直上山梁之頂橫截賊人
碉寨中間一得此處迤下皆可迎办而解阿桂調度
得宜自可乘時席卷迅奏膚功

同日

上諭內閣曰曹順自調赴軍兵以來節次勦殺兵衆無
不奮勉爭先著有勞績是以屢加拔擢用至總兵今
因攻克黃草坪碉卡先登督戰受傷陣亡深可憫惜

著加恩交該部查照從前李全之例給予應得卹典
仍入祀昭忠祠並著該員本籍督撫查明曹順之子
現年若干先行奏聞俟其服闋後即行送部引見

臣等謹案人臣以身許國疆場効命奮勇捐軀
分所應然如總兵曹順先因殺賊攻碉屢著勞
績擢授專閫其感奮自倍尋常茲於攻克黃草
坪時指揮督戰以致受傷陣亡實無愧死綏之
義乃蒙

特頒諭旨

恩卹優加入祀昭忠祠且

垂詢其子年歲令於服闋引

見俾死者沐褒卹之

深仁生者感激揚之大義凡在我行有不感發天良願
効干城腹心之寄者乎

丁卯明亮舒常奏言查扎烏古為賊人河西緊要
門戶經官兵搶上山梁盡行佔據人心悉以動搖

是以納木迪寨落賊人即於前晚自行放火焚棄
相近二十餘處寨落亦皆棄空惟其上斯底葉安
週圍幾及二十里共有寨落三十餘處臣等公同
商酌現在我兵拏柵與阿爾古相接雖有木城攔
路亦無難以次攻克但西北一角未及肅清即向
南徑進未免後顧可虞自應先於斯底葉安一路
乘賊人慌亂進攻等之摧枯拉朽隨於初九日夜
派令侍衛進財保參領額爾伯克等由扎烏古下

壓副將全保遊擊常格等由琅谷分進兩路鼓勇
夾攻賊人始猶放鎗滾石以圖堵禦及至官兵逼
近將在前數處寨落搶奪其餘各寨賊人先已潰
竄官兵盡力追殺將斯底葉安悉行佔據現因曲
碩木寨落隱於西面山溝之內未經掃除是以達
爾圖得楞基木斯丹當噶等處防兵難以遽撤而
新克地方寬廣各須派兵防禦惟相取緊要酌量
分布即於斯底葉安既克之後將所有寨落悉行

燒燬僅於適中立一營盤自固是晚即有賊衆滋
擾經官兵俟其臨近用排鎗擊打無不披靡
而遁又於初十日丑刻派令奎林和隆武珠爾格
德等由扎烏古搶上山梁連克五碉現於新得地
方共擎木城十二座此日惟日斯滿別起山峯上
至已扎木賊人共有十七碉林立其間與教成一
路尚為隔絕現擬日內務期克取則自甲索以下
勢若建瓴於聲勢尤為聯絡且可將達爾圖以至

基木斯丹當噶留防各兵盡抽為打仗之用於兵力亦見裕如過此一重險要其前雖有乃當一道山梁環繞於南然去路甚多賊人斷無力量逐處堵擋臣等惟有盡心籌畫乘勝進剿以期迅速集事奏入

上諭軍機大臣曰明亮等奏連日攻克日斯滿以下山梁碉卡並納木迪官寨斯底葉安一帶地方均已掃洗覽奏欣慰日內想早已得手自可酌抽基木斯丹

當噶一帶防兵並為打仗之處又據奏稱我兵拏柵
下與阿爾古相接雖有木城攔路亦無難以次攻克
等語而投番阿旺亦供索諾木派人到阿爾古去把
守是其地尚係賊人所注意明亮等當設法攻取使
賊失其所恃官兵更可乘勝深入徑攻甲索賊寨擒
獲逆酋同膺茂賞明亮等務須奮勉力攻又據稱曲
碩木寨隱於西面山溝之內未經掃除等語其地僅
止一隅明亮宜即統兵掃蕩將河西一帶殲滅淨盡

以杜後患且此處之納木迪寨落賊人先已焚寨而遁而斯底葉安之賊又係望風潰逃固由官兵勇銳賊衆膽落不敢再夫但恐賊人見勢難抗拒詭計棄寨潛避讓進官兵賊或繞出我兵之後計圖阻截於事甚有關係不可不防明亮等必須將後路料理肅清方為妥善今明亮等一路已由扎烏古山梁壓下便可直至河沿與阿桂遙為聲應約會合攻賊衆自更難抵禦即西路科布曲之賊聞之必更慌亂阿桂自

必尅期得勝佇盼紅旗速去

已已富德奏言查布咱爾尼山梁既經我兵佔據
若再攻得中間崖洞便可下壓噶咱普一帶碉卡
但賊人現佔崖洞係在河南山梁第三腿上懸絕
處由布咱爾尼斜行細路僅通一人因將大小礮
位安設於盛得爾瓦古高處對準施放初七日丑
刻派兵百名前進乘黑暗時攀援直上在洞旁藏
匿比及天明突向洞口連拋火彈賊人驚潰隨將

崖洞佔據初九日又克取石卡二座現在鼓勵官兵乘賊人窘迫之際上緊攻取噶咱普得爾烏地方以期必克奏入

上諭軍機大臣曰富德奏攻打布咱爾尼山梁崖洞官兵奮勇直入甚屬可嘉看來此處崖洞為賊人扼要之地既經攻得自可相機乘勝而入閱所獲活口及投番供詞近日賊中情形益加慌亂今富德復從此進攻賊人自更照顧不暇愈足以助西北兩路官兵

可望迅速集事

庚午阿桂豐昇額海蘭察額森特奏言查黃草坪
地方近訊之投番地方阿穰曲又上名強達巴再
上即為安魯木官兵若從阿穰曲向上接拏數柵
即可橫亘山梁中間斷其聯絡應援之勢隨於初
九日夜督令官兵進拏木柵四座初十日夜又拏
柵六座相距賊人已近賊見官兵將斷山梁即於
是夜先在官兵欲進佔之地拏起大木城一座臣

等派普爾普瑚尼爾圖烏什哈達等分為三路向
上直攻臣海蘭察等潛從林箐中間繞出木城自
上下壓將木城克獲殲戮甚多即派兵佔據隨一
面設伏以截來援之賊一面趕緊挈柵至十二日
又拏得八座分兵據守查阿穰曲之下尚有兩山
峯山峯上均有碉寨必應用礮轟摧臣等先已趕
鑄礮位連夜運往併於十三日築起礮臺兩座至
阿穰曲以上強達巴各碉柵勢處上游賊或以為

有恃無恐亦可攻其不備十四日子刻烏什哈達
普爾普等督率官兵突然衝上連克大碉三座木
城四座而福康安泰斐英阿等從阿穆曲而下直
上前而山峯攻克大碉木城各二座殺賊更多因
即趕掣木柵佔住第一山峯並移礮前進擊打第
二山峯之木城石卡此處木城在林箐中間其
前濠溝深濶坡塹陡削正面既難施功若從兩邊
抄下則其旁又設有木城遮護其後寨落頗多接

應放鎗一一可及官兵進攻不免受敵查自阿穰
曲而下有斜岔山腿一支直至勒烏溝河沿其間
雖有寨落三處攻取尚不為難而官兵從此擎柵
而下一至河邊則已遠出雅瑪朋寨及卡布角東
面其西里下截山峯碉寨賊人抵拒無益亦可不
攻自潰而直上索隆古道路甚寬奮力搶佔賊必
益形慌亂現已擎木柵十四座趕緊辦理以期迅
速搗巢奏入

上諭軍機大臣曰阿桂等奏官兵搶上西里山梁從中
擊柵截斷其上下碉寨並經攻克覽之深為欣慰西
里係賊人緊要咽喉今經官兵搶佔尤為得勢賊衆
必更難於抵禦從此迅搗賊巢自可預期奏捷此次
將軍調度督率有方統俟大功告成另加優叙其在
事之出力將領弁兵並著交部議叙領隊各員均能
奮勉集事並屬可嘉而海蘭察每遇攻碉奪隘俱率
衆先登所至克捷功績尤為超衆將來奏凱策勲必

當格外加恩優錫海蘭察亦當努力為之今賞將軍
參贊等及奮勉之領隊大臣大小荷包以示獎勵

癸酉丈綬奏言查凱旋官兵共七萬餘人除留駐
兩金川地方及滇黔官兵由達木巴宗出木坪一
路至雅州水路回營外其餘各路軍營滿漢官兵
丁役俱應由美諾卧龍關至桃關進口通計約五
萬人所需口外沿途各站夫應口糧為數不少查
達木巴宗及資哩舊存糧米雖尚充裕而自達木

已宗直至桃關沿途各站現在祇按站夫日食米數陸續滾運支放並無多餘存貯大兵攻克噶拉依之後糧運或應改由美諾一路轉供其達木巴宗資哩舊儲即須支用縱有餘存亦當為留駐官兵日食斷無向內回運之理則沿途兵夫口糧不可不早為儲備查自桃關以外之大邑坪起至卧龍關以內之二道橋止共八站自卧龍關起至資哩以內之木耳站止共九站就凱旋日起應支官

兵站夫口糧約畧計算每站先須各貯米五六百石隨用隨添方足以資應付臣現飭軍需局酌議指派桃關卧龍關米各五千石上緊交運令該二站將現存額設轉運口糧之夫逐日接遞以桃關之米滾運卧龍關以內各站卧龍關之米滾運資哩以內各站自遠及近遞為存貯以備凱旋兵夫支食庶不致臨時缺乏至木坪一路臺站久撤應先於蘆山縣運貯米三千石俟馬尼官兵會合之

時調撤南路站夫分安木坪一路即可將此項米石就近滾運供支不致有悞至口內沿途支用口糧只須飭令各該地方就近辦備毋庸另籌運貯奏入

上命軍機大臣議奏旋經大學士舒赫德等議覆應如
如奏辦理

上從之

同日明亮舒常奏言查扎烏古為至要關鍵既經

克捷則上自日斯滿下至阿爾古賊人不知我兵
先從何路進攻不得不兼為守禦其勢已分其膽
已怯若即從阿爾古發兵該處寨落雖多而平坡
直路不難一鼓而下第念日斯滿高距山頂雖不
能阻我前進而甲索一路官兵為其隔絕且與達
爾圖斯木斯丹當噶等處尚可潛出滋擾臣等連
日正將日斯滿先行籌辦其阿爾古木城二座之
外在前復有賊碉一座木城後復接卡二座直至

河沿先經額森特在隔河用礮轟摧賊人已難存
駐尚猶挖窖藏匿抵死不去臣等復運大礮在扎
烏古山梁往下攻打查勒烏圍近在對河一面將
預備船隻筏索派委參將鄂輝先行趕搭浮橋以
通來往仍於下流河面稍窄之處加造索橋使兩
路官兵彼此俱有照應於聲勢倍為聯絡惟是日
斯滿山梁以上共有一十七碕其間山峯陡削險
峻異常查日斯滿之南另拖山腿一條地名耳得

谷西面下有深溝一道均係箐林周匝日斯滿守
碉賊人即從溝內箐林中間密為上下若將伊後
路截斷則日斯滿已屬孤懸自可不攻而潰臣等
查耳得谷即為上巴布里尚有中巴布里下巴布
里再下即為阿爾古沿山寨落甚多田地廣濶惟
耳得谷最為扼要其山腿之上有兩處大寨復有
賊卡前後護衛自應先行攻取隨派奎林和隆武
等分左右兩翼從耳得谷下壓另派阿蘭保進財

保等帶兵從左右溝內進發抵禦來擾賊人十八日天明以後令官兵明拉礮車緩步徐行作為運礮之狀將至前敵即猝然下壓分頭並進當經奎林和隆武統兵鼓勇直前衝開賊卡將第一處寨落四面合圍共有賊番五十餘人皆被殲戮無一得脫復殺死頭人錫拉木一名其第三處寨落先已望風潰散惟時溝內之賊聚集二百餘人屢次衝突上山阿蘭保等督兵力戰鎗箭齊發眼見滾

崖落箐不下五六十人餘始潰散竊念賊人所以
死據日斯滿而不棄者不過欲為我後路之患今
其後路轉為我兵所據是日斯滿以至已扎木一
帶碉內賊人諒再不能支持況上已布里既已攻
奪則其中已布里下巴布里寨落雖見稠密而我
兵現當勇氣百倍亦無難乘勝掃除而阿爾古正
如破竹之勢更可迎刃而解奏入

上諭軍機大臣曰明亮等奏攻克耳得谷即上已布里

一摺覽奏欣悅此次攻打耳得谷賊寨奎林和隆武
甚屬奮勉而截殺衝突上山滋擾之賊阿蘭保進財
保等頗為出力著明亮存記統俟大功告成咨部議
叙至額森特雖未親身攻勦立功而於隔河施礮轟
礮礮賊人膽落如此不分畛域方無愧為參贊蓋當
努力自勉共襄大功

平定兩金川方略卷一百二十七

欽定四庫全書

史部

平定兩金川方略卷一百二十八
九

給事中_臣查善長覆勘

總校官原任侍講_臣王燕緒

欽定四庫全書

平定兩金川方略卷一百二十八

十一月丁丑阿桂豐昇額海蘭察額森特奏言查
阿穰曲在手斜岔山腿下寨落三處業於十五日
攻得其一接拏木柵十數座而前茲於十七日復
派兵前往攻得第二座寨落惟將至河沿之第三
座寨牆甚厚賊人聚集死守必須拏柵二十餘座
進逼方能攻撲則稽延時日更多臣等公同商酌

以索隆古一帶路徑頗多官兵從此搶上必須厚
集兵力方可分頭攻打今前敵各處分駐官兵為
數不少即使攻克第三座寨落而第二山峯等處
之賊倘未肯即時潰散則前敵之兵均難抽撤於
直上索隆古分頭搶壓之計斷不能行究不如將
第二山峯木城攻克則直壓至山腿之下勢等建
瓴此處賊人俱可掃盡而自科思果木以至卡布
角各寨落亦必不攻自潰既無他顧之虞便可抽

兵數千以資搶佔前進惟是從第一山峯之上轟擊第二山峯林內之木城賊碉尚未能得力當於十八日夜連拏木柵六座前進並於柵內起築砲臺運砲轟打又派普爾普烏什哈達額爾特等督兵從阿穰曲右手向西南接拏木柵福康安瑚尼爾圖泰斐英阿等帶兵設伏以備賊人來擾現在連拏木柵十七座已繞過第二峯之西南現將運到礮位從旁轟摧在後之西里碉寨查官兵一上

索隆古山梁則道路甚多隨處可進而從瑪爾古以至舍齊賊人皆無從堵截噶拉依即危如累卵故河西一帶雖克扎烏古山梁並已上通甲索然即從此克獲阿爾古甲雜而進抵獨松與噶拉依尚阻大河是以賊人雖亦愛護河西而西里一帶實屬賊人性命所關非但不肯稍為抽撤以助河西並悉索其人竭力死拒以期稍緩須臾之死今臣等從長籌計務將西里山峯寨落尅日掃除以

為迅速搶上索隆古山梁之計奏入

上諭軍機大臣曰阿桂等奏所籌大有把握自即可望得手看來賊人全力專注西里一帶今阿桂等相機進攻自可乘勝克捷而噶拉依賊寨據投番等所供現甚空虛攻之自易為力是掃蕩噶拉依賊巢惟盼阿桂等一路之迅速歲事至河西一帶賊既不能抽兵相助則攻取亦不甚費手今又聞索諾木仍在甲襍而土婦阿倉等現存雍中喇嘛寺明亮等若攻克

阿爾古即馳往甲雜剿擒逆酋並乘勝攻佔獨松兼
可杜賊衆西竄之路彼時或馳赴阿桂處幫同掃平
噶拉依或渡河攻打雍中喇嘛寺擒獲阿倉阿青等
則賊勢更孤明亮等即可由彼處與阿桂約會夾攻
噶拉依巢穴自更可期迅速集勲

同日阿桂豐昇額又奏言梭磨土婦卓爾瑪帶同
伊子已襲土司斯丹巴親赴軍營呈送牛五百頭
酒一千簍糗糒五百背以備犒賞滿漢屯土各兵

之用該土婦懇求甚力頗見誠心因思酒與糴糶
伊老幼千人遠道負至不便仍令運回致滋苦累
當即分給各兵其餘牛隻俱各發還並將該土婦
土司及頭人番衆厚加賞賚甚為欣悅而去查梭
磨係安撫司職銜而近年以來如卓斯甲布巴旺
布拉克底土舍均已晉陞宣慰司今該土婦深知
大義派出隨剿土兵亦多可否將伊子安撫司斯
丹巴進為宣慰司以昭鼓勵之處出自

聖恩奏入

上諭內閣曰梭磨土婦卓爾瑪並伊子安撫土司斯丹
巴恭順可嘉著加恩將斯丹巴賞給宣慰司之職以
示鼓勵

同日郝碩奏言查勒烏圍拉枯喇嘛寺等處及梭
洛栢古大板昭撒拉等站存米統計七萬餘石軍
糧甚為充裕而將軍阿桂現督兵攻獲西里一經
攻克科布曲山梁移營前進所有一切軍糧軍火

即可由勒烏圖一直運供察看道路情形由勒烏
圍前至河岸必須添安一站始能接運其人夫一
項擬即將北路卓克采一帶裁撤人夫內酌撥五
百名加安於此並預備人夫一千名寄存各站以
備添設新站之用奏入

上嘉之

庚辰明亮舒常奏言本月十八日發兵攻搶耳得
谷將日斯滿以至巴扎木各碉賊人俱攔截在內

賊恃其地險礮多猶據守山梁隨派令和隆武珠爾格等並帶同漢土官兵往上進逼一路從梁上直攻一路從箐內繞截賊人雖放鎗滾石而其勢已見披靡當將十七礮隨到隨克直至巴扎木與敖成甲索一路現已上下接通其曲碩木所管一帶寨落賊人望見日斯滿不能據守即將寨落自行放火焚燒先為逃遁現自甲索以至日斯滿自日斯滿以至扎烏古下及臨河俱以攻克則後路

雖極綿長而有此一帶山梁為之關鍵均可無虞

臣等現將達爾圖及得楞基木斯丹當噶等處防

兵俱已裁撤派令由巴扎木礪卡而上接安木城

五座營盤四座務在聲勢聯絡並令馬彪即協同

敖成在甲索駐劄數日以來辦理諸事均有就緒

惟查上巴布里雖已佔據而其中巴布里下巴布

里以及接連之阿爾古數十百處寨落俱於扎烏

古之陽坡乃當之陰坡兩面星羅碁布極見稠密

臣等與各領隊大臣公同籌議查礮占為乃當山頂地形雖極險隘礮卡亦多林立然得設法搶佔則順梁下壓不獨中巴布里下巴布里以及阿爾古等處地方攔截在北皆可不攻自潰且由乃當而南為甲雜官寨再前為獨松官寨乘此軍聲愈振賊膽愈寒之時前途鼓行而進與馬爾邦相接富德一路官兵即可刻期會合是河西賊境全已肅清即正地賊人計惟有相率來降冀全性命而索

諾木弟兄更不能由革布什咱別圖竄匿

同日明亮舒常又奏言自攻打扎烏古以來頭人
土弁及屯土各兵無不奮勇綽斯甲布土司雍中
旺爾結雖屬年輕一切添派土人協同進剿俱遵
伊母澤旺拉木調度甚屬踴躍至土舍綽爾甲木
燦此次連日進攻督率頭人百姓尤為出力合無
仰懇

天恩酌加賞賚以示優異其餘屯土暨各投番

臣

等現

已酌賞銀兩及紬緞布疋銀牌烟茶牛酒等項惟
戴翎最為各番貴重尤宜審慎臣等就其中實在
打仗出色者審之又審將綽斯甲布革布什咱土
舍頭人及屯練中授職各弁分別賞戴奏入

上諭軍機大臣曰明亮等奏官兵現自甲索至日斯滿
扎烏古下及臨河俱已攻克官軍屢次克捷勇氣倍
增現在攻剿乃當迅望得手聞索諾木又在甲雜居
住若明亮等果能乘勝深入直抵甲雜將逆酋擒獲

則噶拉依賊巢及馬爾邦等要隘碉卡皆傳檄而定
無庸復煩兵力設攻得甲雜逆酋仍復竄回巢穴又
當以掃蕩噶拉依為要將克渠逆黨盡行擒縛檻解
獻俘方能歲事明亮等至時當酌量情形如阿桂之
兵已逼近噶拉依明亮等迅速過河攻打雍中喇嘛
寺與阿桂兩面夾攻賊巢則剷除自更迅捷若阿桂
尚未抵噶拉依而明亮等已攻克甲雜獨松又不妨
先由河西往馬爾邦一帶迎進富德之兵過河同剿

賊巢三路合力攻圍賊更不能支延久拒尤可望尅期集事明亮總當妥酌而行又另摺奏綽斯甲布土司雍中旺爾結添人協剿勇躍從事土舍綽爾甲木燦進攻尤為出力甚屬可嘉著傳旨賞給御用大荷包各一對上用朝衣料各一件大緞各一疋雍中旺爾結小荷包四箇綽爾甲木燦小荷包三箇並諭以此等貴重服飾不獨番地難得即在內地臣工亦不能輕得大皇帝因爾弟兄誠心効順特加優賚以示

鼓舞爾等惟當倍加奮勉速助成功將來隨將軍等凱旋入覲大皇帝自必另沛渥恩用昭嘉獎其土婦澤旺拉木並著賞蟒緞一疋大緞一疋交伊等一併祇領賞往

同日明亮舒常又奏言竊照湖廣督

臣

陳輝祖于

九月間先後委員解到皮衣皮帽皮領共四千零六副當即散給存營楚省各兵外內扣除陣亡病故及遣發回籍兵丁六百六十四副

臣

等查備辦

此項軍裝每副不過需銀三兩內外若將多餘皮
衣帽領仍令解回湖廣沿途所需腳價轉見不貲
今索倫吉林兵丁從征已久其隨身衣服日就破
損當此大軍凱旋伊邇自毋庸借支銀兩另為製
備即將多餘皮衣帽領六百六十四副擇其中打
仗出力單寒可念者查明分給奏入

上諭軍機大臣曰陳輝祖所辦固由體恤所屬兵丁起
見但軍營調到兵丁陝甘黔滇皆有其需衣履更換

大畧相同不獨楚省為然今陳輝祖獨恤楚省從征
士卒使有禦寒之具其意雖善而其見則小各省兵
丁同係効力行間惟楚省溫煖適體此外設有衣褐
不完之人欣羨之餘恐不免私怨其該管督撫不知
曲體下情因而心生懈怠于全局甚有關係今大功
指日告成此事原可毋庸置議但就事理而論凡曾
經調兵省分只應將該省派兵若干通知川省總督
如查應製換衣履之時即在成都造辦解交軍營分

給俾其不致偏枯仍令各省照例扣項解還歸款方
為普徧將此諭令四川陝甘雲貴各督撫一體知悉
並諭陳輝祖知之

臣等謹案從征軍士必甘苦適均使之一心協
力誼切同袍如陳輝祖所辦更換衣履固屬體
恤兵丁然專計本省而未嘗籌及全局所見實
未遠大我

皇上準情度理隨事處中諭令凡調兵省分祇應將所

派兵數移知川督時遇製換衣履即在成都辦
送軍營俾人人挾纊一體均平既可無慮向隅
且亦節省運費雖大功就歲而

睿謨指示公溥靡遺可為行軍者永垂

訓誡也

癸未阿桂豐昇額海蘭察額森特奏言阿穰曲第
二山峯木城本在樹林叢密之中不能全身畢露
用礮轟打數日尚未能遽行摧破臣等急于進攻

二十三日派福康安普爾普烏什哈達額爾特分
兵兩隊一從阿穰曲山梁正面進攻一於右手繞
上從旁進攻先令官兵於附近山峯箐林之內潛
往埋伏福康安等帶兵分路沖上而城邊濠溝深
濶其外復有大木重疊橫攔官兵正扳緣前進而
深溝阻隔總難跳越而登維時官兵見有露身柵
上抗拒之賊即行擊射為鎗箭所中者甚多而各
處來援之賊又有一二百人在木城後蔽匿欲為

沖突之計經山峯右手官兵看見將所安砲位從旁轟擊賊始竄入木城固守臣等現又鑄成大砲兩位運往轟摧仍擬即分兵三路上攻木城並木城後兩礮得此兩礮則木城必不能守而一得木城則憑高下壓礮寨亦斷無尚能死守之理并於現拏木柵之下再接木柵十餘座直斷木城兩礮之後賊必不能再施伎倆諒可一鼓而克奏入

上諭軍機大臣曰阿桂等奏官兵攻打西里第二山峯

木城礮卡一摺看此情形賊人不過護死抗拒無能復
為久支況添鑄大礮往轟仍擬分兵搶佔自無難操
券而得至噶拉依現在光景甚屬空虛各番供詞如
一自係實情阿桂等前奏若搶佔索隆古山梁隨處
可進其瑪爾古舍齊之賊皆無從堵禦自可乘勝席
卷但前此番人等曾有賊衆尚欲拒守舍齊喇嘛寺
之供若從索隆古山梁而下路徑果多即可覓間直
搗噶拉依一經掃蕩賊巢其餘賊人礮隘如舍齊雍

中喇嘛寺等皆可傳檄而定便可一面辦理平定事宜一面迅發紅旗報捷

丙戌明亮舒常奏言查自甲索而南突起一峯為礮占第一層險要門戶賊於其上建立大礮五座自南而北至敖成頭敵連有五礮再迤邐而東復又另起一峯攔路其上亦有賊礮五座地勢極為扼塞自礮占而西即與柔染爾相通賊人亦早於沿山上下布列九礮連次遣人跣探礮內俱有賊

人守備

臣

等思巴布里阿爾古一帶寨落若行剿

洗由沿河取道未嘗不可進兵但又須上攻乃當

其前後有數條山腿橫揀河流克之較為費力而

賊人但能自顧目前凡我兵所向即為緊要重地

竭力以防現在阿爾古以及中巴布里下巴布里

每日賊人往來出入照常則其所視為緊要者全

在於此

臣

等即就其意之所及為聲東擊西之法

於二十八九等日挑派官兵從阿爾古之上巴布

里之下逐步逼攻接拿木柵七座賊人數次前來
衝奪而柵之兩旁護衛各官兵鎗箭齊發被殲甚
衆臣等現與各領隊密商已定即在此數日內猝
往礮占乘虛襲擊于制勝機宜更為穩速奏入

上諭軍機大臣曰明亮等奏官兵於巴布里阿爾古適
中之地連拏木柵使賊人悉衆拒守以便乘虛襲取
礮占所籌頗好賊衆每見官兵進攻踪影即集衆併
力抗拒因致艱於得手今明亮等欲明攻阿爾古暗

襲礮占為聲東擊西之計出賊人不意使其照顧不暇深合制勝機宜自應如此辦理礮占在甲索山後地居乃當之上一得礮占便可從上壓取乃當而乃當之下為甲雜獨松等處明亮等於攻克乃當時即統兵徑搗甲雜掃其賊寨方為正辦

同日鄂寶富勒渾郝碩奏言查官兵業經攻克扎烏古日斯滿斯底葉安納木迪等處現在進攻乃當山梁已於勒烏圖以北建造索橋以通西北兩

軍其北路軍糧軍火等項若仍由勒吉爾博一路
輓運未免紆折查自密拉噶拉木起由勒吉爾博
得式梯茹寨沙爾尼至牛廠新安索橋處所計程
四站自密拉噶拉木由巴占黃土坪至牛廠計程
三站運道從此經行可近一站自應酌改密拉噶
拉木現係西北兩路分運處所今北路運道既不
由勒吉爾博轉運應請由密拉噶拉木直運巴占
由巴占分運西北兩路其巴占一站除西路原有

站員外應即以密拉噶拉木北路之站員移駐巴
占查巴占至黃土坪計程一站黃土坪至牛廠計
程半站共應安夫九百名由牛廠再運大營較為
便捷並由勒吉爾博原設臺馬八匹改移黃土坪
得式梯臺馬六匹改移牛廠茹寨臺馬六匹添
黃土坪牛廠二站以供馳遞又查茹寨既已議裁
原設火藥局亦應移安冷角喇嘛寺該處附近大
營且有碉寨堪以存貯似屬妥協臣等現飭勒吉

爾博等處糧員速將貯站米石軍需加緊趕運完竣一面捲撤一面分安俾得源源運供不致稍有貽悞

同日富勒渾又奏言查西路軍糧自拉枯喇嘛寺沿昆色爾山梁直下溝底地名果羅木現安一站其自果羅木至西里寨等處各有營卡砲臺遠近不一均須分路運送酌按道路遠近分別一二三站不等支給背夫口糧腳價轉輸以期節省並免

遲悞至奏凱之後如美諾布朗郭宗勒烏圍噶拉
依俱係留駐防兵處所均應儲備軍糧查後路資
哩薩拉大板昭梭洛栢古各站現俱積米充盈美
諾等處即可就近酌撥而長運商米此時自應加
緊趕運勒烏圍收貯臣已出示各商將原派梭洛
栢古等處米石如有情愿急公改運者即趕運勒
烏圍交收各按站程給與腳價俾駐兵之處均得
稍有儲積無庸臨時另籌撥運均奏入

上嘉之

戊子富德奏言竊

臣

于布咱爾尼山梁石洞之下

屢次攻摧并從沿河兩岸用砲轟擊賊碉賊衆死
力支持未能即下伏思賊境險峻異常又復深溝
密卡層層防護若我兵一往直前未免多致傷損
必須步步接拏木柵前進且戰且守乘間攻擊因
派令舒亮等各領兵丁備帶木植一面放鎗攻擊
一面拏柵前進賊人屢次衝突俱被我兵擊敗十

一月初一日寅刻舒亮等乘賊不備帶領官兵沖擊拋擲火彈鎗砲齊施將沿河卡子五座立即奪據維時賊人聚衆救援我兵一面迎敵一面于所獲卡旁拏起木柵固守賊人技無所施旋即逃散此次打仗殺傷賊衆甚多奏入

上諭軍機大臣曰阿桂明亮等兩路官兵現俱深入攻克要隘富德又能如此前進佇見大功告成覽之深為喜悅富德當盡心籌辦更圖進取並傳諭將軍等

同力勉之以期迅奏膚功

己丑阿桂豐昇額海蘭察額森特奏言查西里第
二山峯名奔布魯木此番接拏木柵在奔布魯木
山峯木城兩礮之下西里正寨之上官兵橫亘其
中硬拏木柵料賊人情窘勢屈自必合力迎拒且
此處係上下鎗砲一一可擊之地官兵容易受傷
必應分賊之勢始可拏柵前進當派福康安瑚尼
爾圖泰斐英阿帶兵前進先為拏柵官兵防護即

派額森特等帶兵隨進拏柵又派普爾普等帶第二隊之兵烏什哈達五福等帶第三隊之兵緊隨進發接拏木柵臣海蘭察率同官達色格勒爾德等進攻奔布魯木山峯木城碉卡併為各路策應官兵乘夜奮迅前進從鎗砲中間步步拏柵而前賊人拚死沖突均被官兵施放鎗箭痛殲敗回遂接拏木柵十餘座已環繞於山峯兩碉寨之後越過山脊而東臣等即於新拏木柵之內用砲轟擊

兩礮已多塌損其兩礮外尚有一礮最當扼要因
限於地勢用砲未能得力復於初二日夜接拏大
木柵一座築起砲臺用砲轟摧臣等揆度賊情官
兵木柵已截出木城礮寨之後三面皆有官兵其向
東一面山勢極為陡削不能合圍因此處係賊人
緊要咽喉雖山梁上下往來路絕白日已不能行
走而東面陡險之處尚有微徑爬越可行仍復死
守不去若從第一峯之左手拏柵而下與自右手

拏進繞過東南之木柵彼此相對鎗砲擊打賊人
即於夜間繞越亦有所難第此一帶上下山勢橫
斜道途叢雜必得分兵攻打始足以牽綴賊勢當
令五岱富興率同各將領等駐守勒烏圍前敵而
臣額森特帶兵千餘來赴西里山腿盡處合力攻
打初三日晚臣海蘭察分派各兵一面令將預備
木植趕拏木柵一面分兵三路進撲臣海蘭察督
令官兵直抵山峯木城之下奮力亟攻拋擲火彈

延燒木城官兵乘勢騰擁而上賊人踉蹌奔出官兵尾追截殺殲戮甚多並滾崖跌斃者不少餘俱燒斃于內其福康安等帶兵攻入各碉寨並於寨牆窰孔放火焚燒官兵四面圍定賊人不能逸出亦均斃于火無得脫者而普爾普烏什哈達等之兵向上攻圍碉座賊見官兵勢猛且各處烟焰散天力不能支從碉跳越而逃經普爾普等帶兵壓下鎗箭所及又多殺戮維時已及三更三隊合兵

自上冲壓而下直至西里正寨寨內賊人一面放鎗拒敵一面奔竄又將寨落克取官兵乘勢攻壓其寨後尚有山腿一處賊人仍思拒守而官兵已分兩翼抄下賊亦旋行潰散所有迤下山腿各碉卡隨攻隨克將近四更官兵已壓至溝邊維時臣額森特望見西里山梁官兵已層層鏖戰而下迅即率同保寧常祿等攻撲西里山腿盡處木城亦經克獲此次打仗共得木城九座大寨四座石碉

七座石卡數十座殺賊百餘人查雅瑪朋寨落之
東寨名舍勒固祖魯其從阿穰曲左手岔下山腿
盡處亦有一寨名瓦喇占得此二處則非但雅瑪
朋寨落又已攔截于內而從此均可直上科布曲
索隆古即使賊酋等攢集拒守而我兵既無他顧
之虞又可多為撤出以資前進自不難於力取奏
入

上諭內閣曰阿桂等攻克各處要隘多方籌畫調度合

宜屢戰克捷實屬可嘉現在大功指日告成將軍等
自當特膺茂賞所有先登制勝之參贊海蘭察及帶
兵勇往之領隊大臣福康安等均著交部議叙其隨
從分隊打仗出力之滿漢屯土各兵並著將軍等查
明賞給一月錢糧以示鼓勵

上諭軍機大臣曰此次官兵奮勇克捷海蘭察及福康
安等並有旨交部議叙矣至在事之滿漢屯土各兵
亦諭令賞給一月錢糧此專指隨隊打仗者而言伊

等皆能不避鎗石突進摧堅其中如有勇銳超羣者
並當查明予以巴圖魯號餘俱奮勉効力自當加之
賞費用勵勤勞若守營守卡之衆與身列行陣者不
同原可毋庸概及如此微示區別更足以昭激勸又
據奏到羅博瓦色泐普喇穆喇穆三處戰圖現已留
覽此次征勦金川由力戰而得者甚多較之西師之
役將士等尤為出力自當擇其功績最著者多為繪
畫以彰武成盛典將此傳諭知之

平定兩金川方畧卷一百二十八